

PRAVILNIK 11. TURNIRA MJESNIH ZAJEDNICA OPĆINE TEŠANJ

JU „Sportsko - rekreacioni centar“ Tešanj uz pokroviteljstvo Općine Tešanj organizuje 11. turnir mjesnih zajednica Općine Tešanj. Turnir će biti organizovan za sljedeće sportove:

- futsal,
- stoni tenis,
- streljaštvo.

Turnirom rukovodi Organizacioni odbor koji daje tumačenje odigravanja i odlučuje o eventualnim molbama ili žalbama i disciplinskim mjerama u svom domenu.

FUTSAL

Otvorenje turnira (izvlačenje parova za nogomet) je 23.12.2025. u 16:30h u prostorijama Biblioteke Tešanj, a utakmice se igraju od 25.12. – 28.12.2025. godine sistemom eliminacije.

Satnicu turnira određuje Organizator na osnovu broja prijavljenih ekipa. Utakmice se igraju 2 x 10 minuta. Vrijeme igre se ne zaustavlja u toku utakmice, osim u slučaju većeg prekida na signal sudije, a posljednje dvije minute poluvremena se zastavlja svaki prekid igre.

Svaka ekipa ima pravo u svakom poluvremenu na jedan time-out od jedne minute i to se vrijeme ne računa u igru. Time-out može zatražiti voditelj ekipe ili kapiten kod delegata utakmice kada njegova ekipa ima loptu u posjedu. Odmor u poluvremenu traje 3 (tri) minute.

Nazivi i sportska oprema ekipa:

Nazivi i sportska oprema ekipa na ovom turniru ne mogu sadržavati znakove ili nazive neprimjerenog sadržaja, stranačkih obilježja niti sadržaja koji vrijeđaju nečije dostojanstvo ili ugled. Dresovi ili reklamne majice ne mogu biti iste boje kod dvije ekipe koje igraju utakmicu (u ovom slučaju druga ekipa će obući markere koje će zadužiti od organizatora turnira).

Broj igrača i službenih osoba:

Prijava za učešće na turniru podnose se na propisanom obrazcu koji je u prilogu ovog pravilnika i koji mora biti ovjeren od službene osobe i pečatom MZ.

Svaka Mjesna zajednica može prijaviti najviše dvije ekipe.

Igrači koji predstavljaju mjesnu zajednicu moraju biti mještani mjesne zajednice koju predstavljaju - po CIPS-u.

Ekipa koja predstavlja mjesnu zajednicu, broji minimalno 7, a maksimalno 12 igrača.

Promjena spiska igrača u toku trajanja turnira je moguća za max 3 (tri) igrača koji su iz iste mjesne zajednice i koji nisu nastupili ni za jednu ekipu na turniru. Ukupan broj jedne ekipe na utakmici može biti 12 igrača+ maksimalno jedna službena osoba.

Svaka ekipa na terenu sastoji se od 5 igrača (4 + golman).

U slučaju kršenja ovih pravila ekipa će biti diskvalifikovana sa turnira o čemu donosi odluku Organizacioni odbor.

Izmjene igrača:

Izmjene igrača i vratara su „leteće“ i to na mjestu predviđenom za izmjene.

Izmjene se vrše na način da prvo izlazi igrač sa terena pa onda ulazi zamjena.

Izmjene igrača kontrolira sudija, te je predviđena kazna za 2 minute isključenja igrača iz igre zbog nepropisno izvedene izmjene.

Golman:

Golman uvodi loptu u igru rukom.

Prilikom uvođenja lopte u igru, golman može rukom prebaciti središnju liniju igrališta, kao i u toku igre. Golman ne može postići pogodak rukom u nijednoj situaciji. Prilikom uvođenja lopte u igru golman može imati loptu u posjedu golmanskog prostora najviše 4 sekunde. Prekršaj ovog pravila tretira se kao indirektan udarac i ne ulazi u akumulirane prekršaje.

Golmanu se (osim nenamjerno) ne može vratiti lopta u ruke osim dijelom tijela od koljena pa naviše.

Akumulirani prekršaji:

Sve utakmice turnira igraju se sa akumuliranim prekršajima gdje se u svakom poluvremenu može imati do 5 (pet) prekršaja s tim da 6. (šesti) i svaki sljedeći izvodi u obliku kaznenog udarca sa 10 metara.

Disciplinske mjere:

Disciplinske mjere u igri, na ovom turniru, su:

- žuti karton
- drugi žuti karton (crveni)
- direktni crveni karton.

Žuti karton je disciplinska mjera OPOMENE.

Za crveni karton nakon drugog žutog kartona, igrač napušta teren a njegova zamjena ulazi nakon 2 (dvije) minute ili po primljenom pogotku njegove ekipe.

Za direktni crveni karton, igrač napušta teren a njegova zamjena ulazi nakon 2 (dvije) minute ili prije po primljenom pogotku njegove ekipe.

Direktni crveni karton je automatski suspenzija igrača i ne može nastupiti za ekipu u narednoj utakmici, a spisak ekipe se ne može dopuniti sa novim igračem kao zamjena za suspendovanog. Isključenje rezervnog igrača ili službene osobe ne sankcionira se isključenjem na dvije minute jednog igrača sa terena.

Isključeni igrači:

Minimalni broj igrača jedne ekipe na terenu je pet (četiri igrača + golman). Ukoliko jedna ekipa ostane sa jednim igračem + golman, utakmica se prekida i protivnička ekipa je pobjednik utakmice.

Opća pravila:

Poluvrijeme ili kraj utakmice nastupa istekom vremena i oglašavanjem sirene na semaforu.

Iz početnog udarca ne može se postići pogodak.

Klizeći start dozvoljen je na loptu ali samo kada u neposrednoj blizini, po procjeni sudije, nema protivničkog igrača.

Zavisno o vrsti situacije, sudije može dozvoliti prednost u igri.

U slučaju prekršaja za napadačku ekipu, u golmanskome prostoru odbrambene ekipe, sudija će dosuditi kazneni udarac sa 6 metara- ovaj prekršaj ulazi u akumulirane prekršaje.

Kod svih nastavaka igre, protivnički igrači moraju biti udaljeni 5 m od lopte, a kod izvođenja auta protivnički igrač mora biti udaljen minimalno 3m.

Svi nastavci igre moraju se odigrati u roku od 4 (četiri) sekunde od kada je izvođač u posjedu lopte ili od znaka sudije za nastavak igre.

Ubacivanje iz auta izvodi se nogom sa aut linije ili van terena.

Prilikom izvođenja 6-eraca, golman mora stojati uz gol liniju.

- U slučaju neriješenog rezultata nakon isteka regularnog vremena, pobjednik se određuje izvođenjem po tri 6-terca, a u slučaju i tada neriješenog rezultata šutira se po jedan 6-terac do dobijanja pobjednika.

Tumačenje eventualnih spornih situacija kod izvođenja 6-eraca za konačno dobivanje pobjednika ili izvođenje 6-erca u zadnjoj sekundi regularnog susreta:

- ukoliko golman, nakon izvedenog 6-erca, odbije loptu a ona u svojoj putanji završi u голу, pogodak će se priznati,
- ukoliko lopta pogodi stativu ili prečku pa se odbije u tijelo golmana i uđe u gol, pogodak će se priznati,
- ukoliko igrač koji izvodi 6-erac poslije udarca ometa golmana koji je u situaciji branjenja, pogodak neće biti priznat zbog ometanja golmana,
- ukoliko golman obrani udarac uhvativši loptu i onda je ispusti i ona uđe u gol, pogodak će biti priznat,
- sudija zviždukom daje znak za početak i kraj udarca kod izvođenja 6-eraca.

Ukoliko se dogodi da bilo koja ekipa, učesnica turnira, ne dođe na termin odigravanja utakmice koje zakazuje Organizator utakmica se registruje 3:0 za protivnika i takva ekipa podliježe disciplinskim mjerama Organizatora.

Svaki igrač može nastupiti samo za jednu ekipu na ovom turniru, inače podliježe disciplinskim mjerama Organizatora, kako lično tako i ekipe za koje nastupi.

Za incidente bilo kakve vrste (verbalni ili fizički napad na protivničkog ili svog igrača, verbalni ili fizički napad na službene osobe iz organizacije turnira, verbalni ili fizički napad na gledatelje, nedolično ili nesportsko ponašanje prema bilo kojem sudioniku turnira i sl.) od strane pojedinca ili ekipe, automatski slijedi suspenzija. Ukoliko incident izazove pojedinac sam on će biti suspendovan, a ukoliko su incident izazvali dva ili više igrača bit će suspendovana čitava ekipa.

Posebno pravilo:

Strogo zabranjeno psovanje! Bilo kakva psovka izrečena od strane igrača na terenu ili na klupi te službenih osoba sa klupe, upućena bilo kojem sudioniku turnira za vrijeme igre, sudija je dužan počinoca kazniti opomenom (žuti karton) ili isključenjem (crveni karton) i udaljavanjem sa terena, bez prava na vraćanje u igru.

Žalbe:

Svaka ekipa uz potpis službene osobe, ukoliko se smatra oštećenim u bilo kojem obliku na ovom turniru, ima pravo žalbe. Žalba se može uložiti pismeno po donesenom rješenju ili u zapisnik utakmice i to neposredno pred početak, u tijeku ili 10 minuta po završetku utakmice. S obrazloženjem žalbe prilaže se novčana taksa u iznosu od 50,00 KM koja se u slučaju pozitivnog rješenja žalbe vraća žalitelju. Bez pologa takse, žalba se ne razmatra. Organizacioni odbor dužan je u roku od 60 minuta od zaprimljene žalbe isti razmotriti i donijeti rješenje. Doneseno rješenje OO je konačno.

STONI TENIS

Turnir u stonom tenisu se igra u nedjelju 28.12.2025.godine sa početkom u 14h.

Svaka MZ sa područja Općine Tešanj može prijaviti jednu ekipu za stoni tenis.

Ekipu ispred MZ čine dva igrača, koji će učestvovati u igri stonog tenisa - parovi. Članovi ekipe moraju biti iz MZ koju predstavljaju bez ograničenja u godinama starosti. Za pojedinačno takmičenje može se prijaviti neograničen broj igrača bez ograničenja u godinama starosti. Takmičenje u pojedinačnoj konkurenciji će biti organizovano u dvije kategorije i to za žene i za muškarce. Mečevi parova se igraju na dva dobijena seta, a pojedinačni na tri dobijena seta. Set se igra do 11 poena uz promjenu serve svaka dva poena. Rukovodioc takmičenja će odlučiti o načinu igre, (nokaut ili grupe) do dobijanja konačnog pobjednika.

Prijave ekipa podnose se organizatoru na propisanom obrascu ovjerenom od strane MZ.

U obzir će se uzeti prijave koje budu dostavljene organizatoru 48 sata prije početka takmičenja.

STRELJAŠTVO

Takmičenje u streljaštvu je u nedjelju 28.12.2025.godine sa početkom u 17h.

Svaka MZ sa područja Općine Tešanj može prijaviti jednu ekipu za streljaštvo.

Ekipu ispred MZ čine 3 člana (može miješano muško, žensko).

Članovi ekipe moraju biti iz MZ koju predstavljaju bez ograničenja u godinama starosti. Za pojedinačno takmičenje mogu se prijaviti neograničen broj igrača mlađih od 30 godina starosti.

Takmičarima u sastavu ekipe će se rezultati računati i u pojedinačnoj konkurenciji.

- Pobjednik turnira je ona ekipa koja bude imala najveći broj krugova.

- U pojedinačnoj konkurenciji pobjednik je takmičar/ka sa najvećim brojem krugova.

- U slučaju istog broja krugova pobjednik je ona ekipa ili takmičar koji bude imao više 10-tki, ili 9-tki ili 8-ica.

- Takmičari se takmiče u stojećem stavu serijskom vazdušnom puškom

- Takmičari će na raspolaganju imati 5 probnih hitaca u jednu metu

- Meč je na 10 dijabola u dvije mete po 5 dijabola

- U slučaju više pogodaka u metu od 5 takmičaru se odbija najveći pogodak
 - Organizator se obavezuje da obezbijedi vazdušne puške, dijabole i mete za sve takmičare
 - Takmičar može pristupiti na takmičenje i vlastitom vazdušnom puškom serijske proizvodnje bez ikakvih optičkih pomagala na istoj i sa urednom dokumentacijom o vlasniku oružja.
 - Na liniji za gađanje svi takmičari se moraju ponašati po uputstvima linijskog sudije a ukoliko dođe do narušavanja pravila linijski sudija može udaljiti takmičara sa linije za gađanje.
 - Svaki takmičar ima pravo pogledati svoje mete nakon ocjenjivanja i ukoliko je nezadovoljan ocjenjivanjem može priložiti prigovor na ocjenu mete. U slučaju prigovora formirat će se Komisija koja će pregledati i ocijeniti takmičarsku metu za koju je podnešen prigovor. Organizator će na osnovu Zapisnika o obavljenom takmičenju proglasiti najuspješnije ekipe i pojedince.
- U obzir će se uzeti prijave koje budu dostavljene organizatoru 48 sata prije početka takmičenja.

Tešanj, decembar 2025.godine.

Organizacioni odbor